

序

世論詩者拘官閥限南北禪風井蛙也京朝中雍容侍從東方枚臯之徒出口多鳳凰池上語自號能詩如是則非徐僕射沈侍中代無作者不幾令猿鶴笑人乎雖然姚魏名花亦稱天然富麗而深林之下露菌霜菊反謂丘壑過之非通論矣昔人窮工之說小言破道蠲蠲齧貧鬼相責於風雅頌何與從來妙若文賦尚嫌綺語未盡彼蟲喧兩耳之薛能飯顚山之杜子美人且譏之只可鬪僧清未足當韓豪言非無據故騶虞關雎清廟生

西田集序

民未始不陸離翠粲也庾子山哀江南賦溫子昇韓陵片石一南一北誰置低昂佛助誤魏書好祇南士無異越人之笈章甫後世錢虞山選列朝詩譽南士而祖翰材如病吟嚙矣若夫春婢弄雙聲又曉確北土之音發軒渠已耳昌黎文唯其是少陵別裁偽體詩固未可膠柱論也嘗持此論質之顓荈先生曾不河漢吾言蓋先生自入洛之年負太原之望即深于詩者昔沈約云吾少好百家之書身為四代之史江左風流未有名位蟬聯文才相繼如王氏之盛者斯言唯先生當之先生留連

墳素揚抑性精鏘洋館庭藻思曷發其為詩也獨標清吟波屬雲委不屑為唐人早朝俳體而歷下竟陵殘瀋淨盡宅人春華先生秋實也諸家淫蠅之聲先生韶夏之樂也西田集乃二十餘年游歷所編如蠶婦衲客酒樓吹臺新柳漁父盤山燕子磯等篇衆山皆響接漢連霞兩下錢唐一渡富春江郎山上窅兀三峯仙霞關前鐘魚一路嗽楓亭之荔子眺謝客之石門境隨意轉情逐言深雖成連鼓水仙而去列子御長風以行未足班其詩格也悼亡作哀箏咽管又正中之變矣余讀先生詩

西田集序

辟彼登山徒仰峻極同夫觀海莫際濶鳥足踞論先生之詩以先生今日士之焱飛景附煜雪其間者詞場殆徧而先生擅美推能風情雅潤嶸崎歷落之槩無不磬折欣賞詩蓋肖其為人哉余行役袁浦得湖隄截句三十章先生泚筆和之時當槐序麥信風來何如旦饑維憂用老再讀先生新詩無謂世無萱草也庚辰五月下浣濟南弟田雯謨

序

吾師婁東少宰公錄所著古今諸體詩若干卷名曰西田集將編次剗刷適奉

簡命視工兩河時維春首風雪盛作輶車候騎衝寒首塗一宿至良鄉寓書於錢子韶三俾以集示丹林而命為之序丹林承命悚怖累月未敢措手也嘗聞昌黎韓子曰驩娛之辭難工而愁苦之言易好是故文章之事恒發於羈旅草野王公大人非性生而好之則不暇以為歐陽子亦曰詩以窮而後工竊以為不然夫詩三百篇正變錯出要歸

雷集序

於溫柔敦厚而已召公之矢音吉甫之作頌道美揚盛標準萬古豈必羈窮落拓而後工於詞哉蓋士方窮時其為思也必沈鬱而悲涼其為言也必峭厲而巉削即自名一家而與古人忠厚之意浸遠唐之東野浪仙元英昭諫率未免此此非其不幸歟若夫起華胄涉通塗優游廊廟而發皇事業和平之思積於肺腑而又深研篤嗜以求合乎古之作者其詩之工百倍於草野羈窮之士無疑矣且游山川者披荒榛攀絕壑幽翳窅窅駭心目終不如太嶽之開霽大江之澄澈也覽物候者廻

飈冷雨驚雷急雪愀乎其可悲凜乎其可愕終不如時和景煦風日恬美之為樂也窮達異趣而詩境亦異狀豈殊是乎丹林弁淺蕪陋無以窺公詩學於萬一而讀是集也融融洋洋元氣流溢本之以和平溫厚出之以紆徐委備行乎所不得不行而止乎所不得不止變化騰蹕要於自然有以探三百篇之源流而得風雅之正豈羈窮草野之士所能爭勝於豪釐者哉當茲使節倥傯王事鞅掌將建汲鄭濟世之功而猶惓惓於述作若此是則昌黎所云王公大人性生而好之也西田者公先

西田集序

二

世別墅溪山風物不類塵宇以是名集殆猶古人思穎之意歟讀公詩可以知公志已庚辰孟夏錢塘受業門人王丹林謹序

西田集總目錄

卷一

古今體詩八十八首

卷二

古今體詩八十七首

卷三

古今體詩八十七首

卷四

古今體詩九十三首

西田集目錄

一

西田集目錄

卷一

放鶴亭

岳忠武王墓

飛來峰

韜光菴

淨慈寺

法相寺

理安寺

湖樓雨望

懷吳聖符表兄官蘄水

採蓮曲

東園晚步

懷陳省齋

元夕後三日同周子

俶公咸家惟夏次谷暨諸兄集誦侯弟齋

西田集目錄

一

分得初字

城南觀梅

雨中顧伊人唐實君見過留飲

送黃萊園侍御還朝

北行別內

泊京口

將渡黃河思親有作

登太白酒樓

途中作

罄陽曉發

濟南客舍

長安旅舍懷諸兄弟

留別同館諸公

出都門作

遠將歸

高郵舟夜

宿邵伯

歸家

贈筠士上人

得陳省齋信

再過湖上

湖心亭

黃龍院

昭慶寺樓小至同沈

台臣隨菴兄小酌夜話

靈隱寺

留題韜光菴

天竺寺

旅夜

送曹倬雲入閩

送隨菴兄之臨安

得家信

送隨菴兄從武林歸

別湖上

夜聞漁歌

戊午元旦

自遣

過支硎山寺

宿中峰

過鄧尉山寺

聞梵

新柳

空齋

贈漁父

詠綠陰

寄李厚菴學士

虹友兄歸述黃山諸

勝兼讀新詩

題仇十洲畫美人溪

堂銷夏圖

溪亭獨坐

孫屺瞻學士見訪即返吳門賦寄

李述修編修書至招予入都賦答

鷗

賀友人以薦舉入史

館

月夜懷茂京姪

過聲菴

秋盡

陸石渠客任縣晚宜施君幕中晚宜亡後

官事牽累石渠聞訃星馳爲經紀其喪詩

以送之

蠶婦歎

哭匡令兄二首

詠瓶荷戲贈

懷周翼微

哭澍兒四首

輓許孝子福初

送同年友人之官粵

東

過白衣菴晤南明上

人

菱溪道中

經廢寺

螢火

何處能忘暑二首

題顧荇文倣北苑夏

山雨霽圖

夢先慈

李璇宮書至談及史事賦寄

哭周翼微

卷二

詠石屏

祖仁淵少參招同汪

恂甫劉彥度高子建次谷兄遊青山莊

秣陵懷古

燕子磯阻風逢舊

聞角

和錢右文舍人天藻

堂中秋翫月用許郢州鶴林寺韻

秋聲二首

芝廬兄招同憚正叔

許九日沈台臣郁弘初吳省初家次谷兄

暨諸兄弟集古期齋看菊分得六麻

送筠士上人入閩

蘿資園感舊二首

十月朔展先大人墓同諸兄弟飲諤亭

師齋賦以志感

滇南告捷

壽隨菴兄六十二首

過西田有感三首

綠畫閣坐雨

西田集目錄

四

春夜得徐健菴宮贊書

西郊晚歸

上巳日偶成兼懷顧

彝樸編修

和徐健菴喜吳漢槎

南還次韻

納涼

送錢宸安之任羅城二首

孟繹來宮諭見訪留飲

正月二日新霽

二月八日吳歷所招

集悟香溪屋分限閒字

懷陳省初

送鶴尹兄之江右

虹友兄齋同吳漢槎夜話

送友北上

送芝廬兄之茂京姪

任所三首

武林遇鶴尹兄從江

右歸疊前韻

陳廣陵招飲

送周公咸先婦

登桐君山

過釣臺謁嚴先生祠

舟行

次谷兄嘲予思家口

占荅之

灘聲

雨泊衢州

題青湖店壁

江郎山

仙霞關

山行

楓嶺遇姜綺李

西田集目錄

五

將發浦城

浦城舟次對雨

過建溪

登延平百角樓

將至三山憶同里諸子

過陳省齋舊居

荔枝

弔制府范觀公先生

作家書

寄內

黃閭伯書孝經見贈賦謝

立秋日懷諸兄弟

聽雨

過平山華林寺訪姜綺季留飲

七夕

夢歸

許不棄招集團亭即事

三山旅舍中秋無月

登鼓山

喝水巖

宿湧泉寺示知有寶月二上人

歸舟口占

九日舟中

送沈台臣之粵東

延平道中別魯非熊

懷王石谷

建溪道中夜泊

曉發

雨後登陸

過嶺口占

蘭溪道中

過七里灘

舟抵吳江

西田集目錄

六

抵家

卷三

吳門別同里諸子

舟泊梁谿飲溪山第

一樓

憶書齋牡丹

沈郎歌

維揚送次谷兄歸

過滁州

渡淮示同行諸子

將入中州界

謁張睢陽廟

汴城別董蒼水

渡淇水

鄴城懷古

室人多病詩以憶之

渚陽署中留別芝廬兄茂京姪

送許生洲視學秦中

七夕外舅宋蓼天先生招飲迎紫閣

病中口占二首

外舅宋公入相喜而

有作二首

閱萬曆秦昌天啟實

錄偶成八首

詠庭樹

送大司寇魏環溪先生予告歸里二首

登慈仁寺毘盧閣

秋日懷沈台臣

送周公咸南歸

喜陳廣陵入都

入署口占

奉視學兩浙之命

口占二首

甲子除夕

西田集目錄

七

出都別館中諸同年

雄縣道中

河間道中遇李仙菴

僉事

章夏雨中懷都門知

已

望岱

山行寫所見四首

大末送余不遠歸閩

甌江道中次公咸韻

擬遊鴈蕩以雨不果次隨菴兄韻

台州署中望巾子山

天台道中大雨

新昌道中

署中偶成

隨菴兄歸自武林余

將赴東甌賦詩留別次韻送之二首

暮雨渡錢塘次虹友兄韻

富陽道中 過嚴陵釣臺

十八夜見月二首 金華曉發次虹友兄

韻 永康道中疊前韻

過桃花嶺 雨後登大觀亭

謁文信國祠次北歸宿江心寺原韻

碁局 將別甌署用孟襄陽

樂成館卧病懷歸韻

懷惠研谿 石門洞

西田集目錄

括蒼誌感 張梅巖太守餞飲八

詠樓 夜至龍丘驛次周公

咸韻 嚴陵舟中得家信

武林署中偶成次次谷兄韻

送友歸吳門次隨菴兄韻

九日同幕中諸友登煙雨樓分韻得壺字

自歎 題王石谷南歸贈行

詩 使竣去浙漫成四首

暫返里門 述懷

留別州守余獻展

卷四

月下飲雲陽三義閣懷韓慕廬學士同集
者為周公咸謬亭師次谷兄茂京姪奕兒
也 遊平山堂是日謬亭

師為予祖道邀飲舟中徧歷虹橋之勝而

賦 別周公咸謬亭師次

谷兄北行 峒嵒曉發懷諸兄弟

雨 途次偶成

新泰道中見荷花 羊太傅墓

題道旁松 七夕旅宿

西田集目錄

涿鹿道中望西山 入都

不寐 哭周公咸三首

陪祀南郊恭紀 送李述脩編修出守

臨江 偶成

送孟繹來學士南歸次徐健菴司寇韻二

首 纂脩一統志上總裁

諸先生 中秋卧病

己巳孟秋宿署齋經月同志數人流連觴

詠李木菴侍讀首唱紀事次韻和之

同李木菴侍讀西郊閒眺

通州野宿

途次過陸澹成脩撰

夜宿村庄

三河道中示同事諸

公

龐庄夜雨

曉發遇雪

薊州道中遇宮定菴

李木菴吳恕菴同行

山邨月夜

宿石門

再過龐庄阻風

李木菴招遊盤山期

於薊州偕往余以阻風後至悵然賦此

和錢葭湄奉常半舫詩次原韻

春深

除夜喜沈台臣入都

西田集目錄

十

壽黃劬雲六十

送虹友兄赴顧觀廬

侍講幕

真香亭雅集次陳乾

齋編修韻二首

送蔡方麓宮允歸覲

二首

贈沈子夔五首

贈周子燦三首

壬申除夕次錢葭湄

廷尉韻

送沈台臣南歸次留

別原韻

悼亡雜詩三十首

聖駕北征蕩平詩十首之四

送友人南歸

題龔敬立意止齋圖

二首

西田集卷一

太倉王揆藻儒

放鶴亭

鶴去知何處空亭傳至今共憐遺跡在誰識古人

心檻外湖光遠堦前草色深風流嗟已矣撫景一

長吟

岳忠武王墓

宋寢俱淪滅湖濱廟貌崇偏安輕社稷恢復痛英

雄猿嘯空山月鷗號古木風惟餘憑弔者灑淚夕

陽中

西田集卷一

一

飛來峰

絕勝傳靈鷲飛來不記年玲瓏寒滴雨蒼翠暮生

烟樹老崖巔石雲歸洞裏天孤亭臨澗側坐聽響

潺湲

韜光菴

汨汨泉聲咽踈篁滿徑幽置身孤嶺上極目遠江

流海色連諸浦山光盡一樓茲遊驚絕勝欲別重

淹留

淨慈寺

南屏山麓絕纖埃紺碧莊嚴佛寺開花覆一庭沾

法雨雲生半嶺護經臺長松門外清陰合孤塔池中倒影來正欲逢僧問金鯽匆匆歸棹夕陽催

法相寺

信步南峰下諸峰翠層疊石徑何逶迤禪宮儼瑤闕喬柯攬虬龍夾道森成列躡級躋香臺蓮座燈光澈嗟嗟累劫餘世事幾消歇佛力何其神色相完無缺隨意憩僧房几榻稱幽潔謾謾松風來清涼沃煩熱倚檻矚踈篁暗泉石間咽對面碧峰寒一徑雲林接幽賞足怡情昔賢每棲屑四壁走龍蛇點畫蒼如鐵疑有神物護百年未磨滅

有李長蘅先生題壁

西田集卷一

二

平生厭塵囂對此心爲豁起視白日斜行行不能別

理安寺

平生塵俗意到此一時空世隔千峰外人行萬壑中鐘聲松院靜澗響石橋通歎息還歸去尋幽興未窮

湖樓雨望

一雨春全減凭闌客思孤烟深時沒樹水長欲平湖燕雀低空有峰巒遠望無明朝稍晴霽攜酒向山隅

懷吳聖符表兄官蘄水

記把離觴送去旌楚雲吳樹兩含情關山不覺多年別戈甲俄驚滿地生八口倉皇歸遠道一官漂泊寄孤城莫因世難思鄉井談笑文儒可却兵

採蓮曲

桂楫輕搖水面飛浪花風起濺羅衣紛紛笑向中流去奪取新開並蒂歸

東園晚步

深秋天氣爽出郭晚風輕三徑碧梧落一溪寒水清庭空來鴈影燈靜響蛩聲坐對盈樽酒陶然物

西田集卷一

三

外情

懷陳省齋

記向金門把酒卮連茵並馬落花時三年共事俄分散數口還家又亂離白骨豈真埋虎穴

時傳殉難之信

丹心應自戀龍墀爲言虞寄如無恙蚤報江東故

友知

元夕後三日同周子叔公咸家惟夏次谷

暨諸兄集誦侯弟齋分得初字

小閣開尊雨霽初坐中相對盡應徐話當深處忘更永酒到酣時覺病除

是日適有微恙

風遞歌聲春院靜波

搖燈影夜潭虛詩成莫漫誇良會回首關山正羽書

城南觀梅

恰逢晴色是今朝一騎探梅過板橋滿樹花開看似雪日光著處不曾消

雨中顧伊人唐實君見過留飲

午餘睡起鬢蓬鬆半捲湘簾樹色重花落正愁春意減客來轉喜雨聲濃閒窓漫檢書千卷孤燭徐消酒一鍾只恐夜闌歸路滑茗香清話到晨鐘

送黃萊園侍御還朝

西田集卷一

四

我別歸滄海君行向玉除思親千里夢報國萬言書關月迎征蓋山花送客車東南民力盡入告待何如

北行別內

爲別金閨夜淒其各淚流關心惟數語分手在孤舟遠道一官累空囊兩地愁高堂頭似雪爭敢戀皇州

泊京口

滔滔江上水日夕送行舟怪殺燈前淚春潮一樣流

將渡黃河思親有作

客路蕭條客夢牽思親遙望白雲邊趨程漸歎庭闈隔愛日難禁涕淚漣莽莽暮烟青嶂雨依依遠岸綠楊蟬只今尚有江南意渡却黃河又一天

登太白酒樓

昔賢曾此地把酒一高吟偶爾閒憑眺淒然感古今殘碑荒蘚剥危堞夕陽沈落落東遊客空懷千載心

途中作

功名世爭趨親老適爲累非云輕組紱離別心所

西田集卷一

五

悸我父雖矍鑠形神漸憔悴兒孫繞膝前老懷差足慰豈圖王程迫敦促理征轡揮淚拜堂前戚戚心如醉白髮彊開顏歛歛暗流涕執手顧予言大孝在養志溫清矜小節區區奚足貴丈夫志四方家國本一致努力向京華黽勉從王事移孝以作忠君親兩不愧承命別鄉關驅車渡河濟千里走風塵炎蒸汗沾背荒雞旅店鳴野犬空村吠千疊亂雲黃一抹遙山翠觸境生悲懷淚下不可制豈不覲微祿豈不羨高位所悲歲月徂愛日心莫遂念彼絕裾者碌碌竟何爲顧影每自憐傍徨夜不

寐惟期叫閭闔許遂寧親計匹馬返故園重效班
衣戲東郊芍藥妍西圃芙蓉媚追隨鶴髮翁優游
共百歲

整陽曉發

征鐸驚殘夢趨程驛路重空山半輪月遠寺一聲
鐘地白蓬根火天青馬首峰頻年經過此寥落感
行蹤

濟南客舍

每念倚閭者歸心常浩然況逢秋色老能不旅愁
牽風急山城鴈霜淒驛路蟬穆陵關外客掩淚向

南天

西田集卷一

六

長安旅舍懷諸兄弟

孤館風清響暮砧丹楓黃菊正蕭森關山千里羈
愁結兄弟三秋別夢深索米不堪論宦況趨庭應
各慰親心田園蕪沒徵輪急遙想驅愁只苦吟

留別同館諸公

載筆追隨玉署清銜恩歸去出都城風塵憔悴
憐今別湖海蕭疎遂昔情戀闕有心千里隔寧
親無計一官輕雲霄努力諸公事翹首沙堤次第
行

出都門作

小臣幸許乞閒身暫別承明向海濱去國豈能忘
聖主還鄉聊欲慰衰親黃塵走馬蘆溝暮綠酒
看花茂苑春莫怪朝衣輕脫却堂前贏得彩衣新

遠將歸

遠將歸神爲飛一日行千里猶云馬去遲水潺潺
兮山嶕嶢音書吟斷無鴻鯉近却家鄉喜轉愁逢
人欲問還中已遠將歸莫再離長安縱有爲官樂
豈如骨肉長相隨

高郵舟夜

西田集卷一

七

遙天寒月上夾岸野風吹千里扁舟夜孤燈獨坐
時烟波秋森森雲樹暮離離寥落秦郵客羈愁祇
自知

宿邵伯

蕭條孤驛外烟水一舟維野曠月來疾汀寒鴈宿
遲淒淒難自遣僕僕更何爲明日江南近歸帆信
所之

歸家

暫得朝簪解飄然還故鄉征蓬千里月旅服九秋
霜湖海身應老風塵鬢欲蒼欣諧扇枕願長此卧

滄浪

贈筠士上人

幾度尋蘭若今朝識已公悟從千佛透詩到十年
工洗鉢松林雨翻經竹院風何時謝塵事共隱白
雲中

得陳省齋信

故人幾載悵離羣海嶠今看息寇氛蹭蹬一官應
念我飄零數口正憐君窮途阮籍惟耽酒遭亂盧
諶雅善文手展雙魚追往事燕臺回首淚紛紛

再過湖上

西田集卷一

八

重向紅亭繫畫橈三年烽火倍蕭條依然留得西
湖在衰草荒烟自六橋

湖心亭

十里烟波合中流峙一亭湖光搖檻碧山色入窓
青日月行相近雲霞變不停勾留因駐此夕磬響
南屏

黃龍院

閒尋蘭若意悠然竹木深幽別有天曲逕層層青
嶂裏小窓面面碧池邊泉流石壁含新雨鳥度松
林破晚烟悔却勞勞塵網悞可能老此共棲禪

昭慶寺樓小至同沈台臣隨菴兄夜話

促坐虛窓燈火明客中佳節倍傷情思歸却悔經
旬別苦雨難逢幾日晴正喜微陽添一線寧辭孤
盞坐三更僧房且作連牀話攜手青山到處行

靈隱寺

古刹岩巖起碧空四山蒼翠夾烟叢松連絕嶂當
門迴竹引流泉繞院通佛座香消清磬裏講堂僧
定白雲中當年龍象今誰繼遺墨淒涼憶遠公

留別韜光菴

一別韜光又幾年泉聲竹色故依然憑闌極目千

西田集卷二

九

山外滄海澄江共碧天

天竺寺

一逕籃輿到上方白雲層疊護禪房五峰日落松
濤響三竺風生桂子香澗咽清泉聲細細門藏脩
竹影蒼蒼千年異木傳奇事紺殿嵯峨仰法王

旅夜

坐對一燈清蕭條百感生栖栖遊子意落落世人
情酒醉禁風冷衾孤厭月明自憐還自笑底事別
家輕

送曹倬雲入閩

話別僧寮歲欲闌蕭蕭襪被出臨安建溪月落灘
聲急梨嶺雲開黛色寒三載烽烟驚客夢千山風
雪犯征鞍知君此去參戎幕磨盾書成早寄看倖

往謁閩撫吳公

送隨菴兄之臨安

蕭蕭木落亂鴉飛匹馬山城向落暉天若解憐孤
客路不教風雪上征衣

得家信

非不思歸去飄零愧客途書來諸感集家遠一身
孤排悶憑詩卷消閒向酒壚遙憐閨裏夢夜夜到

西田集卷一

十

西湖

送隨菴兄從武林先歸

襪被先歸去衝寒出野塘殘燈消薄醉佳句壓空
囊水驛孤舟月江橋兩岸霜憐君到家近相望獨
淒涼

別湖上

巒光澹蕩水潺湲未忍今朝放棹還徒使遊人腸
欲斷最無情物は湖山

夜聞漁歌

繫纜寒塘酒半醒無端款乃客中聽數聲驚起沙

鷗宿蘆荻蕭蕭月滿汀

戊午元旦

韶光因歲轉愁緒與年更倏忽又今日蹉跎空半
生家貧百計拙親老一官輕世故還多難風塵望
息兵

自遣

頻年懶踏帝京塵領略家園兩度春世味澹時
方信拙酒懷開處暫忘貧但知張翰鄉心切未厭
虞翻骨相屯愛殺溪邊鷗數點飛來故故伴閒身

過支硎山寺

西田集卷一

十一

好景未易逢流光不可駐乘興訪精藍永日耽佳
趣老僧跏趺坐高論忘世慮香臺徐步回動與賞
心遇澹日漏疎篁幽禽囀嘉樹峻嶒石色寒潺湲
水聲注得意暮方歸行行還復住回首白雲中松
風自來去

宿中峰

寂寂靜無事孤燈向夜殘泉流苔徑滑花點石床
寒斜月漏深竹疎鐘飄遠巒得依禪誦侶茗椀話
更闌

過鄧尉山寺

爲愛林巒好禪宮輒往還山空雲影澹僧定磬聲閒
亂瀑奔松徑幽花掩竹關不存身世想忘却在塵寰

聞梵

日落空山裏扶筇下碧岑數聲清梵響松徑白雲深

新柳

婀娜纔看傍曲池綻黃凝綠一枝枝臨風未颺輕
輕絮著雨方垂裊裊絲釣艇偶依微拂影酒旗遙
映淺含姿銷魂豈待春深後旋有蠻腰似舊時

西田集卷一

十一

空齋

空齋常晝掩來往只春風竹色一窓翠花光幾樹
紅書拋微倦後酒盡苦吟中亦是離塵俗凭闌思
不窮

贈漁父

閱盡風濤過眼空浮家只在五湖東不爭事業千
秋後且托生涯一葉中葦岸放歌寒月白蓼汀對
酒夕陽紅時人未識玄真子漁指烟波說釣翁

詠綠陰

陌上蹊邊極望平陰陰長日不知晴遮來葉葉千

叢暗染出枝枝一色成低覆池魚遊處影密藏山
鳥坐時聲春歸莫惜芳菲盡好護王孫駿馬行

寄李厚菴學士

海嶠欣聞奏凱音故人書信達江潯三年誓守孤
臣節一疏能寬聖主心敎就蒼頭成壁壘攜將
白髮避山林酬庸應有新綸下莫漫棲遲戀碧
岑

虹友兄歸述黃山諸勝兼讀新詩

策杖天都衆壑低黃雲如海望中迷崎嶇絕磴千
尋嶺詰曲危梁萬丈溪蘿徑雨昏多虎跡松林月

西田集卷一

十二

落有猿啼勝遊已羨登臨樂況復驚人句遍題

題仇十洲畫美人溪堂銷夏圖

笑折花枝掩面來輕衫綽約獨登臺回頭不敢池
中望怕見新荷並蒂開

溪亭獨坐

孤亭閒坐曲闌凭斷續清歌聽採菱數點白鷗飛
去盡夕陽影裏樹層層

孫杞瞻學士見訪即返吳門賦寄

靜掩柴門落木秋故人相訪慰離愁雲山已恨經
年別樽酒難爲半日留燈暗草堂空下榻月明江

路又迴舟丹楓翠壁蘇臺勝待我藍輿共醉遊

李述脩編修書至招予入都賦答

親年看九十衰病日相親多愧承歡意空懷戀
關心琴尊托興遠魚鳥寄情深前路無勞問蹉跎
已至今

鷗

點點輕飛水面寒消磨風月蓼花灘如何只愛江
湖老不向雲霄振羽翰

賀友人以薦舉入史館

東觀承恩日西清獻賦時官從布衣得名自聖

西田集卷一

古

人知載筆趨鴈列含香入鳳池憐予潦倒甚三徑
獨棲遲

月夜懷茂京姪

見月思君月正明天涯飄泊旅愁生三春花柳江
南夢十月風霜冀北情索米衣從寒夜典積薪官
待選途清消閒客舍憑何事萬壑千峰筆底成

過聲菴

精藍名山下曲徑隱林木入門恣幽蹤一一快心
目牆頭翠色沈風冷敲寒竹斜日度空庭秋容澹
可掬倚檻芙蕖明波搖亂紅綠叢桂飄殘花郁郁

送餘馥老僧相對坐啜茗敘心曲此境隔塵寰恨
不經旬宿嗟嗟世上人日夕爭馳逐豈知富貴中
禍福多倚伏何如禪誦侶寂寂享此福

秋盡

曉起開軒望霜林墮葉紅病來狂飲裏秋盡苦吟
中搖落看逾甚蕭條聽未終懷人無限意盼斷北
來鴻

陸石渠客任縣晚宜施君幕中晚宜亡後
官事牽累石渠聞訃星馳爲經紀其喪
詩以送之

西田集卷一

十五

古道今寥落因君感慨長交情身後見貧況客中
忘江路帆飛月關門馬踏霜瞿公舊時客能不悵
炎涼

蠶婦歎

纖纖素手理蠶筐懶畫雙眉闌曉粧天下無衣何
與我偏教辛苦一春忙

哭匡令兄二首

兄弟荀龍忝盛名鴈行零落失慈明文章夙負空
羣望山水常懷覽勝情斗室焚香圖史靜閒庭絮
石竹梧清最憐總帳新懸處九十高堂動哭聲

男婚女嫁兩茫然一病誰知竟九泉半世長齋非
佞佛十年孤枕似棲禪揮毫槩几羅名蹟輸稅江
鄉剩薄田今日別魂招不得空留高行里閭傳

詠瓶荷戲贈

插向軍持好清能奪衆芳乍辭風露裏得近綺羅
旁失伴原同艷離根亦自香紛紛爭結子憐爾獨
空房

懷周翼微

饑驅襍被走風塵疋馬千山劍閣春不是忘家輕
萬里漫從作客寄孤身詩成官舍燈前酒目斷鄉

西田集卷一

六

關夢裏人聞道王師初息戰故園書信莫辭頻
哭澍兒四首

聰慧人爭羨白眉鳳雛飛去杳難追烟樓撞破成
空想悔殺多生是此兒

廣額豐頤貌若神生來馴狎是天真最憐兩淚紛
如雨一喚回頭彊應人

喜對殘燈把一編向人頻索彩花箋朝來稽首旂
幢下學禮空王阿母前

幾度輕帆挂夕暉阿翁臨出每牽衣只今一棹吳
門路垂絕還憐待我歸

輓許孝子福初

高堂出牧羽書驚閩海飄零滿甲兵策馬間關全
百口寄身鋒鏑保孤城青衫報國經離亂白骨還
家隔死生從此無諸臺畔路啼魂應化杜鵑聲

送同年友人之官粵東

舉目寒蟬羨獨鳴敢言真不負平生但期一疏紓
民困那恤單車度嶺行主聖幸能容直諫臣忠
豈借博高名監門圖畫長沙哭應並當時伏闕
情

過白衣菴晤南明上人

西田集卷一

七

嗟我何爲者乃爲塵網役雖列簪組榮鹿鹿曾何
益偶來郊外遊信步招提僻地遠城市喧門無車
馬迹開軒苔色蒼繞屋溪流碧老僧此閉關鐘磬
消晨夕相逢話禪悅頓令世慮釋人生能幾何轉
眼老相迫勞勞被羈束蕭散寧自適此意解者誰
堪笑青雲客

菱溪道中

沿溪漁唱曉烟深短棹夷猶思不禁到處碧波成
澤國連村綠葉暗桑林遙空霧斂山橫黛野岸花
明地布金願借米家書畫舫一生風月此中尋

經廢寺

古寺今銷歇山門碧蘚封經行人寂寂風掃殿前松

螢火

爾性偏趨熱熒熒入夜忙行藏依草腐高下趨風狂微竊青燈燄難爭白日光一長差足取曾照讀書傍

何處能忘暑二首

何處能忘暑山棲足暢情洞陰藏雪色松古落濤聲曲澗當階過閒雲遶徑生晚來看月上巖翠一

西田集卷一

六

窓明

何處能忘暑禪房曳杖尋千林開寶地一磬冷塵心梵閣天風合香臺法雨深自然空色相不畏火雲侵

題顧苻文倣北苑夏山雨霽圖

碧樹參差巖石間雨餘流水響潺湲平橋脩竹人家在一片烟雲裏亂山

夢先慈

殘缸燄冷擁衾眠入夢音容故宛然死別於今將十載生離先此已三年依依不道重泉隔黯黯難

留一刻緣覺後尋思向何處如珪寒月落窓前

李璇宮書至談及史事賦寄

古人重編摩博採惟三長謂有一字誤千秋淆否臧朝廷開史局載筆皆歐陽鉅公董其事緗帙增輝光此豈徇耳食可以輕雌黃我祖文肅公勲業炳琳瑯苦心爭國本調護在元良功成已不居睿斷歸君王笑彼坐井者昔時徒參商幾今百世後美刺無由彰究之事論定羣疑自消亡咄哉公道在毀譽庸何傷

哭周翼微

西田集卷一

九

衝寒匹馬出緜州一病驚隨逝水流遠道還家惟白骨它鄉送死只蒼頭半生憔悴留長句廿載才名寄浪遊君自黃泉愛春色那知兒女哭荒丘

有走向黃泉看打春之句

絕筆

西田集卷一終

西田集卷二

太倉王揆藻儒著

詠石屏

片石天然圖畫工，短屏一尺傍簾櫳。
奇文皴就深山裏，香霧遮來小閣中。
豈藉錦裝能耀日，却同玉立可當風。
案頭坐看烟雲起，不放飄颻向碧空。

祖仁淵少參，招同汪恂甫、劉彥度、高子建。

次谷兄遊青山莊

載酒郊園永日歡，翩翩賓從此盤桓。
鳥啼深樹當青嶂，花拂輕風遶畫欄。
梓澤名流多嘯詠，竹林狂

西田集卷二

一

態不衣冠，村農未識尋幽意，指點旌旄一路看。

秣陵懷古

臨春遺址草叢生，追數興亡暗愴情。
一曲後庭雖喪國，千秋留得麗華名。

燕子磯阻風逢舊

故人蹤跡久萍蓬，燕子磯頭各掩篷。
爲客偶停揚子棹，相逢翻喜石尤風。
蒼山插岸多朝北，白浪連天盡向東。
明日輕帆安穩發，京江美酒一樽同。

聞角

北固山邊夜向闌，蕭條蓬底夢難安。
一聲嗚咽城

頭角吹起江風作曉寒

和錢右文舍人天藻堂中秋翫月用許鄧

州鶴林寺韻

地白庭空皓魄圓，微茫遠樹澹含烟。
濯來涼露當深夜，掃盡微雲剩碧天。
玉笛一聲飄檻外，彩毫七字落尊前。
自憐不是歡場客，坐對清光憶往年。

秋聲二首

庭葉忽颼颼，聲來漸報秋。
山林方改色，天地若含愁。
蕭瑟催寒近，淒清入夜幽。
虛牕聽不斷，一半似邊頭。

西田集卷二

二

颼颼知何處，虛空忽起聲。
穿林吹不盡，入戶寂還生。
風雨來無跡，陰陽動有情。
坐令千萬樹，落葉滿江城。

芝廬兄招同惲正叔、許九日、沈台臣、郁弘

初、吳省初、家次谷兄暨諸兄弟集古期

齋看菊分得六麻

秋老東籬遍吐葩，蕭齋移賞興偏賒。
香飄檻畔消銀燭，影落杯中亂彩霞。
佳客往來真蔣徑，清樽吟嘯有陶家。
白頭人去花如故，聽說西田感歲華。

談子童時侍先公，于西田齋菊故云。

座間

送筠士上人入閩

秋盡霜林萬葉凋，獨攜瓶鉢趣江潮。
甌閩烽火三年定，休已詩篇一路饒。
月下安禪依野寺，雲中乞食向山樵。
鄉園自有蓮花社，莫使東林久寂寥。

離資園感舊二首

園爲瑯琊鳳麟兩先生故墅，今歸張子佩。
鋤招同人爲文酒之會，各賦二律。

風流不可作，亭榭亦蕭然。
寒雨烏初下，夕陽花欲然。
庭空堆落葉，澗曲亂鳴泉。
林壑無窮趣，招邀有茂先。

西田集卷二

三

信步頻經此，冬來景物奇。
風飄紅入座，月漾碧生池。
少長羣公會，興衰異代思。
繁華總塵土，吟眺不須悲。

十月朔展先大人墓同諸兄弟飲諤亭

師齋賦以志感

霜林葉落雨沈沈，拜謁先塋涕不禁。
風木共含孤子痛，死生獨見古人心。
寒新屢酌銀缸滿，話久頻燒絳蠟深。
料得泉臺靈爽在，也應感泣一沾襟。

滇南告捷

捷書飛奏達神京，銅柱勲高六詔平。
荒服重教歸

版籍中原從此息，戈兵廟謨百戰能摧敵。
世亂三農尚輟耕，翹首紫宸丹詔下九霄。
雨露遍蒼生。

壽隨菴兄六十二首

懸弧今六十，風雅早騰聲。
老亦諧時俗，貧能澹物情。
清譚燈下劇，逸興醉餘生。
非獨稱醇謹，翩翩負令名。

才藻誰能似，蹉跎兩鬢霜。
萬言高制策，十戰屈文場。
潑墨林巒秀，揮毫點曳蒼。
詩名還籍甚，大曆數錢郎。

西田集卷二

四

過西田有感三首

少小追隨白髮親，頻來此地共尋春。
而今春色渾如昨，不見龍鍾倚杖人。

亭榭依然傍水隈，蕭蕭三逕滿蒼苔。
庭花亦似知人意，不比當年爛熳開。

詩僧詞客共流連，載酒看花憶往年。
指點壁間題句在，淒涼名字盡重泉。

綠畫閣坐雨

脩然三逕掩衡茅，孤閣憑高眺遠郊。
深樹含烟山影沒，淺沙得雨浪痕交。
壁間苔老侵蟲穴，檻外林

荒露鳥巢遣興西窓還獨坐蕭蕭風竹冷相敲

春夜得徐健菴宮贊書

靜掩蕭齋夜寂寥春愁離恨兩迢迢月寒孤樹花
偏發風逼殘燈欲銷萬里分飛雙涕淚十年同
事半雲霄尺書頻寄頻生感荏苒流光鬢易凋

西郊晚歸

遣興閒尋郭外村雞聲向晚出柴門潮回芳渚平
沙沒鴉亂空林夕照翻藉草綠粘孤屐齒看山青
抹遠天痕賞心未覺歸來倦且對庭花醉一尊
上巳日偶成兼懷顧彞樸編脩

西田集卷三

五

令節驚心景物同春來愁緒嘆無窮雨滋芳樹垂
簷綠風墮殘花點砌紅潦倒年華貧病裏蹉跎世
事醉眠中故人矯首青雲上爲寄相思與北鴻

和徐健菴喜吳漢槎南還次韻

蚤聞詞賦動江關嚴譴無端遼海間鄉井別來成
昔夢風波歷盡失韶顏廿年已分孤蹤老八口俄
驚萬里還重向垂虹橋畔過湖流應作淚潺湲

納涼

天清澹河漢斜月升高枝流螢亂明滅促織喧堦
暉解衣中庭坐颼颼涼風吹維時椎髻婦相對潛

生悲謂我兩先人淪歿相追隨喪葬雖云畢荒阡
草離離兒女看長大婚嫁難久遲況逢北轅近桂
玉愁天涯嗟哉貧次骨巧婦將安炊君胡不念及
忽忽非其宜余性素落拓聞言亦忸怩沈思默無
語不覺攢雙眉人生天地間詎患寒與饑古人重
立德溫飽非所知俯仰固爲累努力以自支王程
儻見迫疋馬亦可馳知足庶不辱焉用戚戚爲語
既發長喟陶然進一卮

送錢宸安之任羅城二首

聞說羅池勝兔飛向此行一官馳萬里五嶺得孤

西田集卷三

六

城雨過枕榔暗雲開瘴癘清愚溪遺跡在千載繼
高名

盤錯才方見休嗟遠道窮地荒征戰後人苦轉輸
中賣劍流移復鳴琴撫字工三年看報最紫陌避
乘驄

孟繹來宮諭見訪留飲

狂飈起空際鬣鬣飛雲烟雨來天地黑傾注如奔
泉閉戶不敢出匡床聊晏眠午餘勢稍止高樹聞
鳴蟬故人貽鯉魚言歸自練川征篷阻石尤繫纜
郵亭邊思君衣帶隔芳躅稀周旋何期風雨惡江

千今艤船衝泥出城闌握手離愁捐多君不我棄
草堂來踟躕懷中出素筆詩句清且妍大雅久不
作偽體爭流傳誰如孟襄陽斯道得真詮讀罷喜
而愧開尊暢幽悁劇談忘夜永感慨懷當年出入
承明廬彬彬十數賢歲月曾幾何事故多推遷死
生判今古窮達分天淵吾徒幸相遇詩酒歡流連
願爲十日留盡醉吟百篇

正月二日新霽

兩雪偏驚送臘頻庭梅將放一枝新乍晴星斗看
今夕半老風塵惜此身座上裁詩聊遣悶床頭索

西田集卷二

七

酒始知貧春來多少閒風月輪與溪山放散人

二月八日吳歷所招集悟香溪屋分限間

字

爲愛論文共叩關疎林纖月有無間風敲寒竹常
疑雨梅放空庭不藉山吟苦正憐人卧病九日時方抱恙地
幽堪借酒消閒花光歷亂溪光碧莫厭攜筇數往
還

懷陳省齋

屏跡江鄉久索居故交遼海信全疎不堪瀕死干
戈後猶幸偷生竄逐餘報國空憐成一夢思親何

處覓雙魚遙知今夜狼河月應伴羈人照讀書

送鶴尹兄之江右

春來頻聚首棟宇正相親酒罷將千里燈前尚兩
人帆飛江路遠詩壓客囊新不盡臨分意淒其各
愴神

蹤跡都無定黯然離思傷我將遊海嶠君已渡潯
陽兄弟三春別關山萬里長征鴻飛不斷尺素莫
相忘

虹友兄齋同吳漢槎夜話

海內爭傳季子名相逢執手喜還驚廿年塞外空

西田集卷二

八

歸夢一夕燈前似隔生鐵嶺風沙銷戰骨金河笳
鼓駐雄兵知君具有凌雲筆得藉陳湯返漢京漢槎入關得顧梁汾舍人之力爲多

送友北上

三年頻過繫蘭橈書劍今看北去遙潦倒一尊燈
下別蕭騷雙鬢客中彫山迎旭日城頭出花拂輕
風馬背飄賢主幸君逢士稚揮毫潑墨旅愁消

送芝廬兄之茂京姪任所三首

鹿車同載逐征塵領略關河四月春到日渚陽傳
盛事錦衣迎拜白頭人

紅紫三春錦作堆臨行駐馬幾徘徊河陽種得花
千樹不羨江南爛熳開

堪憐蹤跡雪泥鴻兄弟今看西復東料得君歸余
又出春風秋月別愁中

武林遇鶴尹兄從江右歸壘前韻

倏忽又三月相思入夢親那知孤客夜偏值遠歸
人故舊開尊數江山得句新旅遊今若此不羨馬
當神

同是天涯客因君益自傷萍蹤聊逐水鴈影各隨
陽爲喜還家近轉愁行路長相逢又相別今夕莫

輕忘

西田集卷二

九

陳廣陵太史招飲

南遊花柳漫追尋浪跡經旬滯虎林儘有好山堪
放眼卻無佳客可論心多君百里舟輕棹邀我三
更酒細斟珍重孟公投轄意天涯回首暮雲深

送周公咸先歸

爲訪湖山勝西泠喜共遊不堪故人別轉起異鄉
愁峻嶺千盤路危灘一葉舟君歸應念我蹤跡愧
浮鷗

登桐君山

桐江之濱插孤嶂俯瞰江流百尋丈我來艤棹一
登臨振衣飛步巉巖上危磴盤紆絕澗深松杉夾
道山風盪放眼遙看別嶺多烟雲變滅難名狀積
翠排青接遠空層層衆皴如奔浪中有江光匹練
橫布帆幾點輕搖颺野樹斜連曲岸迴水禽低拂
圓沙漲回首山城十萬家彷彿樓臺住蓬閣曾聞
採藥有桐君至今仙跡將安訪鶴馭驚驂竟杳然
空山洞壑仍無恙愧我飄零岐路人此間暫坐心
神曠猶有家鄉千里思指點吳山一長望

過釣臺謁嚴先生祠

西田集卷二

十

先生漢高士志節皎如霜胸中有天地眼底無帝
王故人作天子將相爭騰驤先生獨夷然山水恣
徜徉披裘向富春垂釣山之陽有詔訪故舊安車
來帝鄉共卧足加腹故態何其狂盛衰相倚伏世
事多滄桑雲臺中興佐炎祚同銷亡豈如嚴先生
萬古名猶香我來釣臺下廟貌瞻輝煌兩峰高突
兀鬱鬱松杉蒼羣山迴相抱江水流湯湯肅衣起
再拜齷齪心都忘悠悠千載下我獨思嚴光

舟行

辭家經月不知還一片帆飛萬壑間伴我苦吟來

白髮破人離思得青山有書頻寄雙魚遠無夢難
消孤枕閒極目迴看風景異亂雲深處即梨關

次谷兄嘲予思家口占荅之

出門茫茫何所之千里萬里同一悲憶得出門日
相送兒女隨燈火青熒照離席牽衣問我歸何時
嗟哉浪遊豈得已顧之潛笑還淚垂有兄同我襍
被去酣飲狂歌掃百慮謾言我輩豁達人有樂且
樂問何處去去揚帆并策馬舒心騁目青山下吁
嗟道路行人多試看誰是忘情者

灘聲

西田集卷二

十一

客路淒涼劇可憐灘聲何事響潺湲千村汨汨從
山畔一夜嘈嘈到枕邊方訝殷雷翻大地更疑驟
雨落中天征人愛得還家夢為爾應難放脚眠

雨泊衢州

太末傳形勝巖城控上游戰爭思往日風雨在孤
舟雲合霾荒嶺灘高捲亂流無聊篷底坐頻起拭
吳鉤

題青湖店壁

越溪東去水溶溶回首鄉關隔萬重明日江郎山
下過碧雲深處插芙蓉

江郎山

昨望江郎山今到江郎山三峰突兀插天起去鳥
欲度愁飛還對面絕壁矗相向離奇涌鬱詭萬狀
或為屏障或髻鬟翠樹綠蘿盤頂上樓臺屈曲隱
朦朧陰晴出沒時不同中有飛瀑映初旭一綫倒
挂青天虹吁嗟蓬島不可即丹臺玉室尋無跡似
此靈竒世罕有對之知是仙人宅仙乎仙乎去不
還世人豈必無仙緣願得假我乘風翼飛入白雲
縹緲之層巔相與飡風吸露同千年

仙霞關

西田集卷二

十二

嵐光樹色映晴空策杖經行萬壑中地設雄關控
南北天橫疊嶂亘西東十年烽火餘戎壘一路鐘
魚接梵宮名勝但期長在眼此遊應不恨飄蓬

山行

籃輿一徑萬山長次第峰形應接忙若按高低分
壁壘自隨濃澹出文章泉因石咽聲逾苦樹為嵐
深色更蒼不惜扶筇臨絕頂此身疑在白雲鄉

楓嶺遇姜綺季

先生天下士廿載仰高蹤湖上方為別山中忽漫
逢排雲穿曲澗逐鳥度層峰明日同移棹溪烟又

幾重

將發浦城

急漿輕撓下碧湍相思何處寄平安從今又隔千山遠只恐還家夢亦難

浦城舟次對雨

孤館山城別扁舟野岸停雨添疎樹綠雲失亂峰青脫餌魚跳浪銜泥燕掠汀客愁看又起贏得鬢星星

過建溪

平生數遊蹤南北遍經歷江河幾揚帆湖海曾鼓

西田集卷二

七

枻雖云風波惡對之了無懼茲來七閩遊渡嶺更前發取道由建溪聞者盡咋舌予獨顧之笑爾輩一何怯漸行漸覺異變態呈千百瀲灩風雨至轟轟雷霆擊洪濤噴散珠奔溜飛亂雪盤渦中潏洄輕舟走箭筈振柁差毫釐動輒憂破裂危險坐卧艱驚恐前後接榜人素嫺熟色變神爲懾此險不在水最患溪中石蜿蜒虬龍伏猙獰虎豹列聯綴若星辰峭削或劍戟高者徑尋丈小者僅盈尺水涸溪面浮水漲溪底沒遲疾分利鈍趨避爭巧拙此乃造物工巨靈不能奪勞勞二十年益信天壤

濶險過更思險颯然動毛髮

登延平百角樓

畫棟雕甍俯急流延津名勝暫維舟雲拖雨色橫遮嶺風捲濤聲直上樓千里帆檣孤檻出萬家煙火一窓收塵蹤明日還南去碧樹層層鎖別愁

將至三山憶同里諸子

山水供吾好閩江一棹飛渾忘孤客久祇訝故人稀旅夢迴殘夜鄉心對落暉遙知觴詠處應笑浪遊非

過陳省齋舊居

西田集卷二

古

偶作三山客淒然感故人十年兄弟夢萬里死生身舊宅歸邊將空牀卧老親別來無限淚至此益沾巾

荔枝

六月衝炎不計程間關端爲荔枝行摘貪艷質丹砂重擘認香肌白玉明自是味佳誇異種豈因地遠占芳名廬陵短調眉山句應許千秋作定評

弔制府范觀公先生

兩年秉鉞控甌閩烽火俄驚遍海濱建策未能收叛鎮倒戈偏用殺孤臣

于逆藩降前被害

殘骸零落還鄉國

絕筆蒼涼泣鬼神今日偶過開府地騎箕何處泪沾巾

作家書

久作離家客飄零似轉蓬情牽千里外愁盡一書中
病骨憐逾瘦慳囊笑欲空炎威看漸減蕭瑟又秋風

寄內

浪跡無端梨嶺邊蕭條堪笑亦堪憐羨君兒女團圞坐
猶勝孤燈伴獨眠

黃閭伯書孝經見贈賦謝

西田集卷二

十五

詞壇海內重高名猶記先人共結盟十載幸逢離亂後
九原應識死生情詩才跌宕窮逾健書法森嚴老更精
貽我黃庭真墨寶歸航何慮客裝輕

立秋日懷諸兄弟

金風浙浙又秋初四壁蟲聲細雨餘客久易生離
別夢路遙難得弟兄書蹉跎歲月憐蓬鬢潦倒江湖憶
草廬螺嶺渚陽愁更遠不知蹤跡近何如

兄在任縣三
兄在吉安

聽雨

自來逢久旱毒熱更炎方忽送千山雨平添一夜

涼林昏驚宿鳥草冷咽啼蜚爲喜秋霖好豐年祝故鄉

過平山華林寺訪姜綺季留飲

古寺傍城隈松林一徑開爲貪故人在特倚短筇來
雲合山容斂天低雨色催一尊同客邸敢惜醉方回

七夕

逆旅風光劇可憐一逢佳節一悽然方嗟漂泊空千里
不料蹉跎竟半年酒沸清樽留客話燈明孤榻撥書眠
思家頻起看牛女河影消沈積雨天

西田集卷二

十六

夢歸

涼颼蕭颼空庭暮征人夢返鄉園路幾月身從千里遊
風光一一看如故小閣疎簾几簾陳妻孥促坐問艱辛
水遠山遙話未已咿喔鄰雞苦喚人摩挲起坐不知處
片月亭亭照疎樹

許不棄招集園亭即事

玄度風流逸興饒名園掃徑忽相邀坐皆知已談
因劇酒爲忘形醉易消竹影月殘斜拂地柳陰波
動曲通橋客中莫漫嗟牢落觴詠憑君破寂寥

三山旅舍中秋無月

何事今宵月朦朧不宵明一樽燈下酒千里客中情
幽砌喧蟲語高城送柝聲莫嫌豪興減寂寞慣平生

登鼓山

爲訪名山躡屐行天風謨謨蚤寒生江光曲抱千
村迴海氣晴開萬里明夾迳蒼松承日影傍巖飛
瀑亂蟬聲上方鐘磬泠泠響空谷還疑石鼓鳴

喝水巖

千年靈境快登臨徙倚閒消物外心
蘚磴曲盤崖樹老石橋橫鎖洞雲深亂泉流澗存空澗疎磬聲

西田集卷二

七

微度隔林更上層巖亭畔立江光松影接遙岑

宿湧泉寺示知有寶月二上人

梵宇凌霄出閭來一叩關客眠雲影裏僧定磬聲
間碧浪松千徑蒼烟雨半山幸逢休已在止此未
能還

歸舟口占

蕭騷書劍逐征鴻回首鄉關在海東
半載別來殘夢裏一帆歸去亂山中
溪禽過雨梳翎白野樹經霜墜葉紅
此去故園應裏足好營三徑待春風

九日舟中

東籬有佳菊憐我未還家秋水此間棹寒山何處
花鳥翻晴樹遠雲吐夕陽斜徒有登高興飄蓬愧
物華

送沈台臣之粵東

客路蕭蕭落木頻送君千里獨風塵
它鄉方喜迴征棹遠道偏憐別故人
秋水一江疎雨過曉峰孤塔亂雲新
登臨自是多佳句好記番禺十月春

延平道中別魯非熊

知己不易得逢君逆旅間
一杯此爲別孤棹獨言還
晚樹銜殘照秋雲濕亂山
平生期許在莫漫惜

西田集卷二

六

離顏

懷王石谷

溪流百折嶺千層變幻烟雲見未曾
却恨不同王石谷收來細細寫吳綾

建溪道中夜泊

旅泊知何處停舟數問名
亂流翻月影落葉散秋聲
村靜荒烟合山空野燒明
一樽篷底坐未許客愁生

曉發

霜林夾岸鳥關關蕩漾孤舟千里還
秋曉恰逢溪

雨過濕雲破處出青山

雨後登陸

乍晴雨色尚濛濛一徑籃輿逐曉風四望白雲鋪
似海峰尖青出半天中

過嶺口占

蒼崖合踏水潺湲一逕逶迤萬樹間扶杖直來圖
畫裏烟雲那復問何山

蘭谿道中

黃葉清江路灘聲漸不聞亂帆爭落日遠岫宿歸
雲身計憐蓬轉鄉心託鴈羣故關徒極目客思正

紛紛

過七里灘

綠波漾漾碧峰寒千里鄉關到却難昨日盲風今
日雨扁舟又過子陵灘

舟抵吳江

垂虹橋畔片帆飛烟水蒼茫曙色微回憶閩山憐
久客乍聞吳語喜真歸旗亭霧合林容斂荻浦霜
寒鴈影稀自笑去來緣底事江村冷落釣魚磯

抵家

鎮日勞勞問客程今朝重喜到鄉城雖無山水堪

西田集卷二

九

西田集卷二終

娛目儘有琴書足寄情藜火夜宜看婦織硯田晨
欲課兒耕棲遲擬作終焉計無那王程又趣行

西田集卷二

二

西田集卷三

太倉王 拔藻儒 著

吳門別同里諸子

楊花如雪棟花新送別金閭各愴神十載共君常
嘯詠一官悞我又風塵羞登紫禁叨簪筆悔別青
山負釣綸相憶故園松菊在肯容猿鶴笑斯人

舟泊梁谿飲溪山第一樓

梁鴻谿畔暫停橈好景山樓縱目遙未忍驚花違
故里且貪杯酒共今宵蒼崖暮色雲生樹碧水晴
光月到橋北去漸愁風物改流連此地一魂消

西田集卷三

一

憶書齋牡丹

點紫輕紅似落霞春風檻畔數株斜主人底事緣
偏淺剛到花時又別家

沈郎歌

沈郎沈郎交十年一日不見心悽然圖書共搜索
壺觴每流連性與烟霞契出入相周旋屈指曾幾
時老大蒼鬚髯去年更潮桐江上躡屨閩山策孤
杖灘聲瀌瀌轟奔雷山色蒼蒼列層障白雲吞吐
樹蒙茸競秀爭妍共偃仰歸來獨向羊城去蕭蕭
黃葉江頭樹荏苒居諸秋復冬楊花又見春飄絮

西田集卷三

二

遊子音書竟杳然飄零書劍知何處我聞嶺南山
水天下無名勝迥與尋常殊又聞彼中制府雅好
士萬間廣廈賢豪趨爾豈探奇興不已抑或主賓
投分深相須不然遠客萬里外胡不一念故鄉而
迴車嗟乎相思不可見相見不可期君旣南兮予
又北茫茫雲樹愁天涯何時襍被返東粵更攜詩
卷金臺馳知已京華懽握手讀罷君詩酌君酒玉
山旣倒晨星明醉筆同吟詩一首

維揚送次谷兄歸

楊柳毵毵覆碧灣銜杯相送別邗關鶯花故里多

年共風雨空江一棹還薄宦自憐牛馬走幽棲遙
羨薜蘿閒明朝篷底應回首漠漠烟雲隔亂山

過滁州

策馬孤城夕照間陰陰濃綠覆谿灣醉翁遺跡今
存否一抹遙看面面山

渡淮示同行諸子

孤城臨巨浸匹馬渡斜曛地脉中原近河流淮甸
分麥翻平野浪山綴遠空雲不盡它鄉感村醪喜
共君

將入中州

村墟歷落柳毵毵驚影蛙聲共碧潭時驟雨後一騎積水成潭
斜陽天際遠江南行盡又河南

謁張睢陽廟

蕭條古廟夕陽明滴罷椒漿淚滿纓勢遏江淮憑
一旅志酬君父在孤城援師已絕鄰封望厲鬼空
垂後代名今日停車祠下拜悲風散作鼓鼙聲

汴城別董蒼水

蕭寺閒來叩法輪萍蓬因得笑譚親羨君吳苑推
詞伯同我梁園作旅人擊鉢每吟官舍酒看花頻
憶故山春不堪握手還分手遙送歸颿歇浦濱

西田集卷三

三

渡淇水

淇水粼粼渡夕暉輕塵驛路滿征衣怪它水面差
池燕不解南飛也北飛

鄴城懷古

城銜落日樹棲烏丞相當年此建都空使赤符移
帝祚終教石馬篡皇圖臺荒銅雀人何在園改華
林事已徂今日獨來漳水畔蒼茫一片接平蕪
室人多病詩以憶之

別後知何似淒淒祇自哀病能隨藥去事轉逐愁
來婚嫁紛無已關河杳未回深閨應念我淚眼幾

曾開

渚陽署中留別芝廬兄茂京姪

萍踪暫此駐征輪灼灼葵榴滿院新兩世弟兄千
里合時迪文姪亦從南至三年琴鶴一官貧銜杯異地愁能豁
坐月蕭齋語獨真惆悵不堪明日別火雲如炙又
風塵

送許生洲視學秦中

十年纔喜笑譚親又送朱輪出禁闥搜討異書窮
二陝網羅名士得三秦雲開華嶽山形壯木落蕭
關鴈影新它日廟堂應手額起衰爭說是斯人

西田集卷三

四

七夕外舅宋蓼天先生招飲迎紫閣

尚書築室五雲間退食從容嘯詠閒正愛涼天堪
置酒是日初涼更貪高閣可看山風來禁裏鐘初度日
落林間鳥自還喜得清歌當令節銀河如練月彎
環

病中口占二首

失計緣來此蕭條祇自知最憐多病苦敢訝得官
遲仕路看碁局鄉心憶釣絲遣愁無別策伏枕只
吟詩

自誤已成悔胡爲盡室行妻孥欣會面衣食愧謀

生澹泊安吾素喧涼任世情到時休笑我有命亦公卿

外舅宋公入相喜而有作二首

特簡無煩集衆謀 詔書今日相韓休宣麻已慰蒼生望補衮應分 聖主憂寇盜天南消戰伐輸將閣左困征求乾坤整頓資元老自有 新恩遍海陬

非敢明時尚患貧祇慙坦腹有斯人一官蹭蹬來京國十載飄零滯海濱倦翮更誰憐燕雀素心終擬托松筠欣看廣厦成今日莫怨無端踏軟塵

西田集卷三

五

閱萬曆泰昌天啓實錄偶成八首

神皇初政邁中興柄國羣推元老能百度修明諸弊革累朝相業數江陵

長幼宸衷自不移每緣庭論轉遷期苦心非是先文肅出閣當年未可知

臺省交章買直聲專攻政府勢縱橫由它周召爲元宰未許休休得令名

外庭章奏總塵封萬事頽靡似養癰四十八年真幸甚儉勤亡國痛思宗

紅丸應是誤庸醫挺擊風癩事可疑獨有移宮宜

早決楊漣當日繫安危

封疆功罪豈容誣局外糾彈未盡符廷弼九邊傳首後問誰辨得薊遼無

黨分洛蜀互升沈水火糾紛意見深莫道正人非誤國恩牛怨李亦何心

中璫席寵主權移白馬清流未足奇不是外庭生黨禍忠賢爭敢恣誅夷

詠庭樹

偃蓋亭亭一院幽閒來箕踞暫忘憂乍遮午日驅殘暑又送涼颼報早秋嗚咽亂蟬鳴葉底間關小

西田集卷三

六

鳥坐枝頭怪它亦具干霄勢未得扶疎傍鳳樓

送大司寇魏環溪先生予告歸里二首

都亭祖帳曉陰陰魏相今看出禁林去任直關天

下計安危頻繫 聖人心公養疴邱第時屢
睿懷遣醫賜藥者再投簪敢道

還鄉切馳驛終應戀 闕深它日廟堂思燮理蒲

輪還向碧山岑

道重如公繼者誰銜恩竟已別彤墀 兩朝涕淚

辭鑒日十載風霜抗疏時書牘止期空犴狴埋輪那復問狐狸只今身退功成後留得聲名汗簡垂

登慈仁寺毘盧閣

高閣逼層空登臨望不窮千門殘照裏萬嶺亂雲
中雨過天浮碧秋深樹吐紅
接離宮
雙闕影縹渺

秋日懷沈台臣

落落誰知已思君益旅愁滄江一與別黃葉又經
秋疎懶從人笑蹉跎恥自謀休文觴詠暇應亦念
同遊

送周公咸南歸

失意母潦倒知音世本稀半年同作客一棹又先
歸江冷孤鴻渡霜清衆葉飛故交如問我爲道宦

情微

西田集卷三

七

喜陳廣陵入都

自別陳琳久相思每黯然忽驚千里外共醉一樽
前歌嘯懽今夕湖山憶去年去春與廣陵別湖上新詩知更好

應許擘瓊箋

入署口占

迂踈真與世相違十載滄江擬息機未遂閒情依
釣艇重教病骨挂朝衣凌晨載筆衝殘雪薄暝垂
鞭帶落暉自笑一官拘束甚鄉山蕭瑟夢中歸

奉視學兩浙之命口占二首

鳴珂十日侍楓宸典學驚傳寵命新非分已慚
叨講席不才終恐負廷臣命九卿會舉文行兼優者余謬膺此選安希文
字追先正敢問功名讓後人成例奉差者不與遷轉去國此心
增戀戀征軺愁向越江濱

西泠自昔恣幽尋奉命持衡此再臨愧乏文章
酬聖澤誓將冰蘖表臣心起衰韓愈時難覩得
士歐陽念獨深指點錢塘江畔路好栽桃李待成
陰

甲子除夕

四十今宵盡年華兩鬢催不知愁老至祇自喜春

西田集卷三

八

來除夕恰冬盡日碧綻禁風柳紅肥帶雪梅臘醅看正熟守
歲且銜杯

出都別館中諸同年

手捧天書出禁闥亭亭斜日送征輪不辭道路
由明主難別京華爲故人觴詠流連成昔夢風
塵躑躅誤聞身知君簪筆朝天處碧嶂清江念我
頻

雄縣道中

樹夾長堤水接空蕭疎景物似江東冥冥飛鳥明
湖外落落行人碧柳中去國一身同社燕之官千

里逐春風停驂無限滄洲思未許垂綸伴釣翁

河間道中遇李仙菴僉事

十年風雨滯鄉關
鵲蹉跎斷往還
最喜相逢同客路
卻驚久別各衰顏
簡書鄭重慙余拙
簿領從容羨爾閒
此去西湖雲樹杳
好憑清夢度蒙山

時爲充東道

章夏雨中懷都門知己

颯颯聲何苦
偏教馬背聞
樹昏斜帶雨
山暝半蒸雲
白鷺依沙立
清泉向壑分
此時天上客
曾一帳離羣

西田集卷三

九

望岱

山色周遭信馬蹄
岱宗高峙絕攀躋
龍從未許兒孫並
劣削渾疑星漢齊
風定雲根懸日月
雨收石脚挂虹霓
它年定擬窮遊屐
秦觀峰頭倚醉題

山行寫所見四首

嵐光樹色望重重
迴合千峰與萬峰
白鳥離隄天際起
雙雙飛過翠芙蓉

青驄偶繫綠楊村
狼藉春光野趣存
最愛山家花似雪
半臨溪水半遮門

土屋茅垣白板扉
山村歷落大聲微
一輪斜日青

林外點點歸鴉作隊飛

沙際行人立馬呼
小舠波面狎鷗鳬
歸時好倩荆關筆
寫出溪山問渡圖

大末送余不遠歸閩

纔喜相逢又別筵
爛柯山下送歸船
滄江作客三千里
白髮還家二十年
感舊涕零兵火後
懷人吟罷酒杯前
換鵝書法今誰似
好寫黃庭作硯田

甌江道中次公咸韻

病骨勞勞按部間
扁舟江上暫偷閒
樹頭瀑挂千尋雪
日脚雲鋪萬仞山
鳥嘯深林聲細細
苔侵古

西田集卷三

十

壁色斑斑舊遊回憶誰堪擬
恍入芹溪九曲灣
擬遊鴈蕩以雨不果次隨菴兄韻

漫說探奇促曉征
名山層疊馬頭迎
衝泥豈遂妨幽興
策杖終教負勝情
裊裊亂雲封遠岫
關關野鳥喚新晴
奚囊喜得攜長卷
且自披圖向赤城

台州署中望巾子山

蒼然一峰秀
出沒小窓中
古寺憑雲宿
危崖借石通
雨來雙塔白
日落半林紅
恨乏鞭山術
移將長水東

時駐禾中

天台道中大雨

濃陰漠漠翳層空怪雨如傾更疾風湖海勢移平
地上雷霆聲出小溪中溼雲擁樹山含白急溜衝
沙水泛紅莫待懷襄驚浩劫艱危此已極飄蓬

新昌道中

雲薄霜清十月天赤城東下萬峰連千村紅染秋
風樹片雨青拖暮嶺烟落落琴書甘拙宦勞勞車
馬逼殘年渡江未敢謀高枕蒼弁山邊又泊船

署中偶成

深沈魚鑰鎖重關鎮日勞勞筆硯間性拙偏逢披
覽富官貧難得簿書閒酒緣久斷渾忘醉詩興全

西田集卷三

十一

拋不待刪勲業可應看鏡裏已過四十鬢毛斑

隨菴兄歸自武林余將赴東甌賦詩留別

次韻送之二首

斜挂征帆碧水灣江雲漠漠向家山莫愁剝啄來
蓬徑且倩烟霞護竹關月下銜杯還共醉花間覓
句更誰刪憐余潦倒鄉心切不得相隨舴艋還
乘傳匆匆又永嘉旅程跋涉旅愁賒灘如萬馬奔
流急山作千鬟疊翠斜懶性余方親簿領幽懷君
自痼烟霞不須更羨登臨勝閉戶詩成向客誇

暮雨渡錢塘次虹友兄韻

又別西泠路行行對夕峰雲低巖勢伏風簇浪痕
重漁唱潮初落人烟樹半封坐來方聽雨何處更
疎鐘

富陽道中

客程千里遠早過富春江對此孤舟數憐余短鬢
雙禽喧聲出樹山近影窺窓自笑官爲累雄心半
已降

過嚴陵釣臺

先生垂釣處攬勝却忘歸絕嶂穿雲迴斜陽抱樹
微緣溪花亂落渡嶺鳥孤飛相對高人墓精靈應
共依

西田集卷三

十二

十八夜見月二首

無月頻思月今宵皎皎明羈愁憐客路佳景愛深
更諸嶺暮雲淨一江春水清升沈元不定應識宦
遊情

薄暝孤城下扁舟野水濱乍晴江過雨不寐月依
人皓魄規猶滿良朋坐更親牀頭餘酒在莫厭把
杯頻

金華曉發次虹友兄韻

碧水蒼山不計程筍輿今又趣晨征將收宿霧峰

巔出未褪殘花葉底明身病偏教頻客路官貧祇
合謝時名勞勞百疊烟嵐裏憶殺西田聽雨聲

永康道中疊前韻

驅車那敢憚兼程廻合千峰送遠征綠水平田春
澗滿白鷗飛樹夕陽明買山無計成高隱入世須
知忌盛名何似得歸茆屋好栽花斲石聽松聲

過桃花嶺

自昔稱要害駐兵控小縣疊嶂若奔濤百里自縣
延吞吐白雲微頃刻山腰徧林容雜鳥語四顧心
目眩絕險桃花嶺攀躋使人倦一綫經千盤仰看

西田集卷三

三

起人面嶽峯俯羣峰猿猱弗能旋僕夫足不前問
峇口頻顛爲言山谷民寇盜先遭變昨更值懷襄
水底蛟龍戰漂沒幸餘生救死策無善天道苦非
時未暑炎風煽聽之酸且辛腸若蕉心卷民愁墮
上聞深負時清宴誰繪監門圖一官何足戀

雨後登大觀亭

新雨初收後空亭眺遠明萬山銜落照一水抱孤
城驚截江烟下帆開海霧行亂雲看不斷何處覓
歸程

謁文信國祠次北歸宿江心寺原韻

嗟哉宋祚已如絲欲挽天心事可悲故國山川方
易主小樓坐卧更依誰名成柴市終何補志托黃
冠豈有期南渡孤忠公第一哭公還爲讀遺碑

碁局

碁局紛紜近若何才疎豈合歎蹉跎半生癡夢醒
殊晚三載清名誤實多冷落溪山消客路淒涼風
雨羨漁簑故人衮衮雲霄上迂拙還容卧薜蘿

將別甌署用孟襄陽樂成館卧病懷歸韻
乘輅方決歲轉瞬又經過海近蒸雲密嵐陰作雨
多午窓花影亂曉樹雀聲和舊逕空思蔣孤亭每

西田集卷三

四

憶柯一官誠拙矣雙鬢奈愁何願乞歸帆便垂綸
笠澤波

懷惠研谿

西子湖頭別淚紛音書遠隔故山雲祇緣詩酒常
偕我每遇登臨定憶君官拙年來增落魄才高時
至合空羣遙知風雨孤舟夜搖筆狂吟到夜分

石門洞

似霧如烟百道飛謝公遺跡尚依稀兩崖雲合藏
仙洞半壁泉飛濺客衣荒碣蘚花春雨潤小亭禽
語午風微宵來頻作還家夢到此渾忘放棹歸

括蒼誌感

敢云越俎問民疴凋瘵其如滿目何城自亂離廬
舍少田緣災祲草萊多蕭條野水眠鷗驚零落顏
垣長薜蘿請命更誰陳疾苦 恩綸早與罷催科

張梅巖太守餞飲八詠樓

從容五馬快同遊乘興來登八詠樓盛事昔傳詞
翰在奇觀今合畫圖收山雲窈窕窓中入溪水空
明檻外流難得綺筵當勝地好憑醕酌豁鄉愁

夜至龍丘驛次周公咸韻

懶性偏教滯一官勞勞川陸笑無端謬推月旦羞

西田集卷三

十一

冰鑑悔別林泉負簪冠極目亂雲封遠岫驚心孤
棹渡危灘思家贏得終宵夢千里吳閭欲到難

嚴陵舟中得家信

脉脉閒愁正不禁家書乍展欲沾襟一官愧我貧
逾甚五載憐君病轉深畫舫月涼添客夢烟江鳥
度托歸心無端撥觸還增感隔岸啼鵲伴苦吟

武林署中偶成次次谷兄韻

遮眼文書破日長客懷病思兩相將疎風院靜驚
梧落細雨窓昏逼枕涼美酒輒忘樽易竭新愁未
許斛輕量牆頭一抹山如髻錯認支硎說故鄉

送友人歸吳門次隨菴兄韻

士稚堂前把臂頻五年重接笑談真最憐病骨常
爲客却喜閒情足動人旅館酒殘孤月迴歸舟夢
冷一燈親方君輒作西湖想澹雨疎烟著處新

九日同幕中諸友登烟雨樓分韻得壺字

蕭蕭荻浦接平蕪水色林光互有無未乞閒身拋
組紱漫餘逸興托江湖花明廢圃移雙屐又過鶴洲草堂酒
熟孤舟倒百壺落帽由來誇勝事風流應許讓吾
徒

自歎

西田集卷三

十六

自歎霜毛點鬢齊浮沈三載浙東西詩情不爲愁
時減酒量多緣病後低性拙少知存面目才疎那
敢較雲泥歸心杜宇差能識故向窓前著意啼

題王石谷南歸贈行詩

王城堪隱寄閒身谷口歸耕學子真自愛林泉娛
白髮肯留筆墨沈縑塵馬嘶山店霜花重帆落河
橋月色新多少公卿爭掃榻癡翁早卧尚湖濱

使竣去浙漫成四首

謫劣深慙報稱艱去官略似脫籠鵬剩來羞澀三
年索看遍荒寒兩浙山愁對文書頻引睡懶持杯

酒暫開顏勉頑幸得終王事激灑春江一棹還
可知薄宦稱迂儒身計元來付子虛性僻慣辭昏
夜請手生慵展要津書未除哀樂偏傷我已定升
沈莫問渠不用孤寒齊感泣此心無愧更誰如
到處謳吟聒耳頻敢誇籍籍口碑真掄才寧少遺
珠歎頌德偏多按劍人禹廟日斜孤碣迴各郡俱立石誌感越州者在禹陵岳祠雲設講堂新新建講院於岳王廟旁自憐未具鵞肩相且博虛名慰此身

蕭蕭鈴閣絳帷開多士爭傳問字來詎信文章堪報國不辭貧病為憐才幸拋簿領愁因豁惜別溪

西田集卷三

七

山夢屢回何日乞身重到此冷吟閒醉六橋隈

暫返里門

三年浪跡越江濱落拓歸來笑此身已分迂疎成

拙宦且留清白見先人攜將嘉樹聊醫俗署中多植梅花以二

歸株攜抄得奇書足療貧在浙抄錄秘本頗多松菊依然風月在

前途何必嘆無津困于無津陶士行語

述懷

溟渤深不測風波有時平泰華高無際律岑多人行惟茲仕路險平地羊腸生吁嗟古道歇誰慕巢由名所以歸去來千載高淵明余本放浪者林泉

託幽情得此乃真樂睥睨公與卿

留別州守余獻宸

嶺海知名早關河歷宦深吏才真莫及清節最堪欽瘠土嗟凋敝神君幸辱臨爭傳三異績不到四知金政善催科法民懷撫字心閭閻無虎猛胥吏絕漁侵野秀張公麥堂鳴宓子琴訟庭稀判牒官閣靜披襟戒石宜同佩廉泉且獨斟循良名自昔離別慨如今念我牽行役懷人惠好音關情惟梓里戴德是棠陰子關河始蹉跎歲月駁遙隨諸父老擊壤寄謳吟

西田集卷三

八

西田集卷三終

西田集卷四

太倉王 揆藻儒 著

月下飲雲陽三義閣懷韓慕廬學士同集
者爲周公咸諤亭師次谷兄茂京姪奕
兒也

傑閣憑虛面古城停橈共此話三更不堪揮手人
將別且喜銜盃月正明夜靜玉繩懸岨落天空銀
漢入江清優游何似東山老碧樹紅泉遂隱情

遊平山堂是日諤亭師爲予祖道邀飲舟
中徧歷虹橋之勝而賦

西田集卷四

一

爲憶平山好相攜跨錦韉堂從賢守建名自昔時
傳對面看吳岫憑欄望楚天風流時已改名勝地
應偏南北江光界金銀梵宇連塵襟差輜滌滌思
復相牽堤畔驅金勒林邊繫畫船銜杯酒是聖投
轄主徧賢共指虹橋勝忙移桂棹前搖風低岨柳
映日曲池蓮轉吭鶯聲滑眠波鷺足拳習池方競
美金谷更爭妍榭小花間出廊空屋杪穿雲容蒼
峭壁竹影媚清泉歷歷披圖畫紛紛奏管絃興豪
心自愜地適暑都捐覽勝誠懼矣傷離益黯然風
塵將道路寇盜忽戈鋌楚警後會知何日狂遊惜

此筵繁華渾是夢聚散且隨緣隋苑荒丘雨雷塘
蔓草煙臨岐珍重別一賦北征篇

別周公咸諤亭師次谷兄北行

嶺月溪雲憶舊遊連床官舍幾經秋離觴忽灑他
鄉淚歸夢難消獨夜舟宦跡三年餘我在王程五
日爲君留滯廣陵者五日推篷却望邗溝路嫋嫋垂楊綰別
愁

峒嵒曉發懷諸兄弟

荒雞咿喔一燈昏結束輕裝出華門百道洪濤淹
馬足積水成巨浸半灣殘月掛雲根崎嶇世路愁風鶴偏

西田集卷四

二

側人情念弟昆莫笑炎蒸輕彳亍擬將勞悴答
君恩

雨

昨夜通無寐先愁月暈紅片雲剛出樹猛雨忽隨
風蟬咽吟逾細山昏黛欲空此時羸馬客釣艇憶
江東

途次偶成

無計抽簪赴闕廷風塵爭敢歎飄零官貧但覺
身爲累家遠空愁夢易醒問渡亟乘宵月白占晴
遙盼曉山青客途歷歷添憔悴況復兵戈滿耳聽

新泰道中見荷花

景物依然近故鄉
荷風渚畔送清涼
亭亭不慣行人眼
只道香來太液旁

羊太傅墓

峴山留片石
此地得孤墳
欲酌一杯酒
空憐日暮雲
平吳紆至計
鎮楚樹奇勳
襄帶風流在
如公洵不羣

題道旁松

歷盡風霜歲月長
礪砢似合老林塘
只今楚楚堪憐甚
可許他年作棟梁

孫興公傳中語

西田集卷中

三

七夕旅宿

儘可披襟卧竹林
驚沙底事鬢邊侵
一年又近清秋夜
千里空悲倦客心
淺學自應慚曬腹
無家誰與試穿針
傷離頻起看牛女
愁殺長河向曉沈

涿鹿道中望西山

與山別旬日忽見金天中
繇亘邈千里西瞻太行
通奇峰夏雲似天半開
芙蓉縱橫向復背日氣紛
青紅山腰微雲翳陰晴時
不同吐哉氣象殊靈境
安有窮願言謝簪組采藥尋仙蹤

入都

主恩猶未報無計作閒人
風雨千山路迂頑一病身
羈心依日月鄉夢托菰蓴
強逐鴛鴻侶鳴珂向紫宸

別此餘三載觚稜一夢中
不堪新白髮重對舊秋風
塞馬何憂失林烏孰辨雄
長爲香案吏趨走殿西東

不寐

欲寐還驚起雙眸徹夜開
平安無信到憂患上心來
月影侵簾入蛩聲逼枕哀
一燈遙掛壁相對共徘徊

西田集卷中

四

哭周公咸三首

屈指心期爾獨真
歲寒長擬結松筠
不圖江渚回孤棹
遽向秋風哭故人
閒借酒杯消礪砢
老工文字益精神
平生一事尤堪痛
卜得新阡未葬親

擇於仲冬而初秋死矣

人生真似雪泥鴻
世事堪驚落葉風
獨對孤燈餘我在
却看痛飲與誰同
回思妙論頤堪解
轉憶芳型涕不窮
州檄軍前磨盾鼻
元瑜奏記最稱工

制府李制府李鄭園墓

彥方高行重鄉評
竟以修文赴玉京
豈爲當今方

薄俗不留吾道作千城十年燈火空書劍一月關
河隔死生最感相成臨別語此心無作即功名

陪祀南郊恭紀

端拱乘昌運圜丘祀典崇用辛稽舊禮報本竭深
衷配饗參三祖齋心合上穹雲陰迎幄紫煙炤
蔽空紅掃地羶薌達燔柴冥漠通乾坤分貴賤日
月定西東至敬無文飾加虔慎始終舞非七德陋
樂是九成工祝國時清晏祈年物阜豐六天王鄭
異五時漢秦同務取精誠格能令聚訟空昇平時
已邁美報事尤隆華岳重歸馬天山再掛弓聖

西田集卷四

五

人能饗帝薄海荷成功升降從陽位趨踰效薄躬
一官叨載筆十載惜飄蓬家居者薄領淹江表觚稜
久夢中文多慚繡虎技祇擅雕蟲龍袞隨元后
鵷行逐上公甘泉思有賦奇字媿揚雄

送李述脩編修出守臨江

從容五馬被恩新暫別承明出禁闥求治自應遴
刺史借才因特簡詞臣旌飛玉笥雲連樹帆落金
川月滿津簿領乍膺須努力好將異政荅楓宸

偶成

碌碌緣何事棲遲計總非貧嫌身是累懶覺世多

遠白日愁中度青山夢裏歸慙無匡濟畧敢望碧
霄飛

送孟繹來學士南歸次徐健菴司寇韻二

首

迢迢南北悵江天又送歸帆笠澤邊失馬暫爲投
紱計焚魚遙卜賜環年心依雙闕頻瞻日身入
千峰獨聽泉我亦欲休同倦鳥擬成誓墓續前賢
無端聚散鳳城闈基局驚看又一新三殿幾年
傳彩筆五湖今日作歸人花深野戍嘶征騎柳暗
魚磯拂釣綸最險風波惟宦海滄州容易得閒身

西田集卷四

六

纂脩一統志上總裁諸先生

王氣浮東極真人天啟疆車書尊正朔聲教訖
遐荒駿烈垂謨遠神功卜世長掃除傳列聖端
拱屬今皇四海歌清晏群黎頌阜康尉佗空自
大老滯已先亡早見收交趾旋聞貢越裳武功真
赫濯文治益輝煌疆索恢無外方輿紀未遑鸞臺
司纂輯虎觀命鋪張禹貢嚴敷土周官備職方網
羅無闕失參考必精詳山海窮收采人文藉表章
千秋金鑑在一代石渠藏茲事誠希覲殊能乃擅
場微臣慙固陋清禁幸翱翔有意思窺管無知笑

面牆含毫頻惆悵展卷每傍徨水自潢汙積山寧
土壤妨燃藜公等在竊願附餘光

中秋卧病

蟾光灩澦白于銀冒絮支離歎此身明月有情還
伴我故山無夢正懷人秋深簷葉催寒急夜永釭
花結暈新多少綺筵窮水陸獨親藥椀度蕭晨是夕友人招飲不能赴

己巳孟秋宿署齋經月同志數人流連觴

詠李木菴侍讀首唱紀事次韻和之

接跡官曹非偶爾連旬況復盡忘形談深不覺雲

西田集卷中

七

移樹坐久頻驚月滿庭棋罷枯枰燈半施吟成殘
漏酒初停百年白燕傳佳什老屋蒼然劫火經白燕堂為先朝舊蹟時在其旁小集

同李木菴侍讀西郊閒眺

郊原秋正好聯轡喜同君密樹團荒徑遙山補斷
雲寺空孤塔勢村靜狎鷗羣不是羈官守尋幽向
夕曛

通州夜宿

蒼茫古城外漠漠暮雲橫淡月流寒影疎林作夜
聲帳憐雪壓重夢惜馬嘶驚僕僕從王事辛勤過

一程孝懿皇后梓宮赴山陵余有督夫之役

途次遇陸澹成脩撰

據鞍不能下自笑亦長征幸與故人見聊寬孤客
情林疎千葉落雲靜一峰橫別後還相憶茫茫煙
樹平

夜宿邨庄

茅屋空村裏寥寥隔世氛鴉歸半林月犬吠一籬
雲夜氣荒原合風聲墮葉聞不禁鄉思切垂釣夢
江濱

三河道中示同事諸公

西田集卷中

八

孤蹤不自主百里幸相從馬背落黃葉城頭寒碧
峰林昏添雨色雲凍失秋容千騎看如織飛馳候
六龍

麗庄夜雨

陋室大如斗殘編燈下看一聲村店雨半夜客衾
寒灑葉纔添響沾泥未得乾屬車千萬騎應歎路
行難

曉發遇雪

窻明疑月色千里白無痕立馬柴門外皚皚雪滿
村林藏棲鳥跡山隱凍雲根訪戴心徒切風塵未

易論

薊州道中遇宮定菴李木菴吳恕菴同行
落日漁陽道相逢攬轡同孤城殘雪裏疲馬亂山
中雲過巒拖紫風來葉颭紅遙看峰頂寺松影獨
青葱

山村夜月

荒邨留信宿寂寞四無鄰野曠山千疊天空月一
輪鐘聲寒出寺林影靜依人料得今宵夢清幽自
絕塵

宿石門

西田集卷四

九

策馬投孤店寒颭透薄帷萬峰皆暝後片月獨升
時樹暗人煙隱沙明野火移諸陵看咫尺王氣
出山陞

再過麗庄阻風

重過山住宿連朝阻怪風濤聲來枕上雷殷出林
中捲霧寒蒼麓吹塵暗碧空石尤江海底事困
青驄

李木菴招遊盤山期於薊州偕往余以阻

風後至悵然賦此

孤城駐馬正斜曛後至因于勝侶分風雨連朝偏

滯我煙霞靈境不同君危峰晴吐松巔月奇石寒
棲洞口雲山有五峰八石此去好收名蹟在歸來傾倒慰離
羣

和錢葭湄奉常半舫詩次原韻

煙波逸興自縱橫一室居然汎八瀛從此濟川蘭
楫穩傳來載石桂江清閒憑便作臨流想安坐渾
如鼓枻行不見署齋名画舫知君師此意非輕

春深

綺陌春深碧柳斜一官如寄度年華客來呼酒頻
邀月朝罷尋僧爲乞花猿鶴有情空入夢菊松無

西田集卷四

十

主正思家八騶不羨車前引秋水簾葭逸興賒

除夜喜沈台臣入都

坐擁寒爐對一燈縈窗香篆影層層喜逢故友杯
同把愁聽殘更歲欲增聚散似雲常不定榮枯如
夢亦何憑情騰莫話鄉園事沈醉霜風看玉繩

壽黃劬雲六十

為觀之編
修太翁

夙昔黃公著佳政艱難劇郡才能盛決獄平反冤
滯無其時早卜高門慶偶緣他郡案牽連吏議無
端遽左遷士師三黜甘淪落遠謫遐荒遂幾年從
此飄零黔筑去蠻煙瘴雨天涯路更復南浮下洞

庭吏民盡道來何暮近歲之官遼海濱蕭條邊邑
無人耕蒿目頻頻見歌詠時人擬作春陵行鳳池
有子承恩重御街走馬嘶金鞍本是成都題柱才
給扎今看賦雲夢與公令子共駕行次第知公治
行詳一樽遙獻南山壽佇盼蒲輪入帝鄉

送虹友兄赴顧觀廬侍講幕

羨被初溫帳各天芙蓉幕下去翩翩清樽一別從
今夕寒鬢重逢又隔年不惜征輪長道路自教遊
屐遍山川懷鉛七載看猶昨追憶西湖倍惘然

真香亭雅集次陳乾齋編脩韻二首

西田集卷四

七

緇塵碌碌度三春何幸偷閒得此辰共向西園聯
雅集不勞後閣走窮賓花鬚爛熳欣供眼雞肋蹉
跎笑誤人自是天涯良會少基枰酒盞莫辭頻
風柔日暝景增妍恰是江南櫻笋天茗椀閒惟揮
塵坐藜床倦即撥書眠摘詞藻麗驚師道乾齋首倡二律按
部從容憶彥先觀廬時現學識南羨殺故鄉脩契後桃堤柳
岼競停鞭

送蔡方麓宮允歸觀二首

龍頭十載慶遭逢身惹爐香出九重記注每聆
天語近文章曾荷主恩濃分班玉殿同簪筆待漏

金門共聽鐘慙媿長卿還蜀道未能負弩一相從
都亭祖帳各歔歔烏鳥情深詔許歸致主暫辭
丹闕去思親遙望白雲飛五湖山色供游屐三殿
花香隔禁闌爲語漢皇前席待還家莫戀老萊衣

贈沈子夔五首

彷彿瑤臺月下仙雲軒今夕降瓊筵霓裳舞罷歌
喉轉一串真珠絕可憐
冰雪丰姿秋水神不施粧點自生春老來久絕歡
場夢幾度懜騰爲玉人

不逞嬌嬈步舞茵每於雅淡寫天真知君曾得詩

西田集卷四

七

中意清水芙蓉自出塵子夔能詩

穠李天桃爛若雲難將艷冶並清芬澧蘭生在秋
江畔一種幽芳略似君

朔吹冥濛眼倦開東華車馬日喧逐茫茫十丈紅
塵裏忽覩驚鴻洛浦來

贈周子燦三首

靈和楊柳一枝春舞罷前溪態更新愛殺盈盈羅
襪步勾留紅袖拂香塵

玉樹分行翡翠翻爭誇法曲駕雲門由來國色能
傾國一顧先消一座魂

勝絕分明共鄂舟，當筵頻笑總風流。若教移置香閨裏，不向盧家羨莫愁。

壬申除夕次錢葭濬廷尉韻

老至愁無繫日繩，一尊餞臘對殘燈。又看玉律隨春轉，莫訝霜髭逐歲增。多病每愁無大藥，高談且喜得良朋。朝回自飲屠蘇酒，南望家山到未能。

送沈台臣南歸次留別原韻

入洛名爭羨陸生，驪歌忽唱轉傷情。一鞭前路千山遠，孤館深更片月明。親老喜聞遊子返，官貧羞送故人行。君才八九吞雲夢，相望槐黃達帝京。

悼亡雜詩

夫人宋于歸三十有三年，情好相篤，其母儀壺範于行述中略陳其槩矣。一載以來，隨時遇物觸景，增悲因托諸吟咏，共得七言絕句三十首，聊誌存亡之感，初不計其工拙也。

閨中聲譽重璫璣，鍾郝多應遜未如。拂拭蠻箋磨麝墨，數他懿行不勝書。

王事恒憂家累分，一身中外獨辛勤。退朝幸有芳閨助，得遂忘私答聖君。

無計娛親愧老萊，藉君甘旨佐南陔。九原倘遇姑

嫻日執手應誇孝婦來。

教子母於道義疎，要將經訓作菑畲。前賢往聖常規最，不但篝燈課讀書。

君真知我我知君，雅志常耽猿鶴羣。自是閨中無石友，歸田誰與共耕雲。

玉軸時親任卷舒，挑燈午夜綠窓虛。勞勞操作無多暇，偷得閒來又讀書。

三命曾邀翟萼榮，依然裙布與釵荆。人間失偶尋常事，最是憐他苦一生。

自怨自悲還自悔，如癡如夢復如醒。別來地下君

思我與我思君一樣情。

南北江關幾度過，旅愁閨夢兩如何。與君偕老憐無分，悔却從前浪迹多。

手捧春盤爲薦羞，辛蘋繁家祭必躬親。今朝酌酒空階下，誰是同余拭淚人。

春風今又到雙扉，底事遊仙竟不歸。回首五更催待漏，匆匆忍淚著朝衣。

風逼孤燈月照門，一棺相對坐黃昏。聽殘街市鑼聲，方識今宵是上元。

焚香闌茗小樓中，並倚闌干眺遠空。遺掛傷心春

寂寂一簾寒月一簾風

澹蕩春光哭幾回禁煙時節轉增哀泉臺可有垂
垂柳乞綰芳魂遲我來寒食

班行空逐鷺鴛群割肉何由遺細君德曜亡來無
意緒懶將歌扇問朝雲

月闕如何可再圓葵榴照眼轉淒然總憑續命絲
千縷難續今生已了緣端午

翦玉裁冰綴滿枝怪他憔悴減丰姿多應憐失同
心侶不遣清香似舊時茉莉二盆今歲開
花較小且不甚香

已去芳魂未許招佳期天上有今宵茫茫難問泉
臺路愁見銀河駕鵲橋七夕

絃斷誰爲理素琴伯牙從此失知音不勞夢裡閒
花燭奪我三生共命心夢續結大
慟而覺

風颺疎簾樹影侵孤燈耿耿照孤衾簷前忽送無
情雨滴碎愁人宛轉心

西風吹却髣髴星星悟得浮生水面萍結習半年消
已盡琉璃一盞誦金經

去年禮佛此樓中展誦楞伽曉漏終今夜香消人
不見微雲黯淡月朦朧中秋

丹旄飄飄引素帷秋風浙浙雨花飛分攜生有臨

岐痛況復間關旅櫬歸

秋風掛席向江潭柳正青時水正藍盡室倉黃歸
去後獨留老眼望江南已上二首
送樞回南

起死難尋絳雪丹支離病骨歎形單年年喜縱登
高目今日淒涼怯倚闌九日

每遇恩波笑臉開呼嵩拜舞已多回傷心自賦朝
飛雉不望 天家異數來

扶疎瘦影小窓橫高下憑君細品評人去不如花
耐久可知花亦解傷情夫人病前種菊
數本評其高下

文章勛業兩無成徒累深閨殞鳳城悔殺浮名真
誤我蒲團今擬過殘生

五十過頭死作緣借來四大本非堅他生不論天
人界但得相逢便是仙

相期白首起居同誰道鸞分寶鏡空三十三年成
一夢祇餘往事淚痕中

聖駕北征蕩平詩十首之四有序

皇上神聖文武撫馭萬邦覆冒群生無物失所內
外罔不敬承休命逆藩拒順海隅負固皆以

次削平偉烈鴻功被之金石考稽典冊千古

莫並乃厄魯特噶爾丹者自絕生成狡焉肆
虐擾我外藩方我 朝命

皇上赫然震怒親總六師恭行

天討兵容戰陣之盛靈泉豐州之異皆具書軍府
警動耳目迨兵抵拖林謀者馳報賊踪遂定
策深入 召集禁旅教以止齊授以進退三
軍之士勇氣百倍賊震懼 天威鼠奔鳥散
適西路大軍尅期進發遇賊奮擊執馘獻俘
所獲婦子牛羊之屬不可勝算師旋歌凱率
土懽騰臣蒙被

西田集卷四

七

聖恩備位卿列不得執橐鍵以從事戎行惟與諸
臣跪奉捷書於職司之暇作爲北征詩十章
以揚道

聖德神功於萬一深媿辭學淺薄不足傳示無極
以增 盛世之光然 臣伏見
皇上治兵振旅功績神奇發自

宸衷獨決 睿斷智周造化之先效速旬日之內
頌颺之私弗敢自後謹稽首再拜以 獻

沐浴恩膏遍海隅普天拜舞盡嵩呼梯航久已來
琛矢沙漠何當聚虎貙玉帳風沙行絕域金城輦

鼓用前驅邊塵未靖勞西顧幸見 君王丈二及
廷論誰窺 廟略雄 至尊赫怒自臨戎一勞永
作安民計獨斷方成掃穴功奮武威行邊塞外除
殘恩遍幅幘中萬方送喜歡無極祇覺憂勞萃
聖躬

勾陳肅穆度雄關不勒燕然不擬還美草迎車青
羣麋靈泉湧地碧潺湲龍韜默運風雲上虎旅紛
騰障隧間自是天心惟助順師行旌席出陰山
極天蟠地盡宣威早見連營士馬歸萬里師旋輕
薄伐八旬凱奏仰神機于今沙塞安旃幕從此邊

西田集卷五

六

關卸鐵衣共樂昇平爭蹈舞羽林齊擁 六龍飛
送友人南歸

河橋秋柳拂征衣此去關山逐雁飛契濶正嫌良
會少別離應悵故人稀君懷負米辭京國我爲思
萼夢釣磯幾載青門頻送客翩翩萊綵羨南歸
題龔敬立意止齋圖二首

卜居何必在山岑自有桃源近可尋思遠不妨蒿
徑窄身閒唯覺草堂深梅邊卧石綠聽鳥竹下呼
童為抱琴却笑張融多事甚牽船岸上亦勞心
意止名齋意不窮圖成妙手景偏工蘋花春水鷗

鷓鴣雨柳樹斜陽薺麥風
鬪酒清尊波沸綠吟詩刻
燭暈添紅從知大地三千
界要在先生一著中

西田集卷四